

## Evening Dogri (NSD) News

03-March- 2026

1915 hrs

### खास खबरां

1. प्रधानमंत्री नरेन्द्र मोदी होरें आखेआ ऐ जे भारत अपनी मजबूत अर्थबवस्था दे कारण दुनिया लेई इक मेद दी किरण बने दा ऐ। बजट दे बाद आहले इक वेबीनार च उ'नें आखेया जे मयार कन्नै समझौता कीते बिजन ओ मता उत्पादन ते निर्यात करन।
2. नागरिकता संशोधन कनून तैहत दायर याचिकाएं पर सुनवाई करने लेई केन्द्र नै पच्छिम बंगाल च दंडु होर बाइखतयार कमेटियें दा गठन करने दा फैसला लैता ऐ।
3. पच्छिम एशिया च गतिरोध उप्परोतली बधदा जा'रदा ऐ। इजरायल नै तहरान ते बैरुत च केई फौजी ठकाने पर जबरदस्त हमले कीते न।
4. अमरीका नै इस्लामिक रेवोल्यूशनरी गार्ड कोर दे कमान सेटर गी तबाह करी दिता ऐ ते ईरान दियें रक्षा छमताएं- मिसाईलें ते मिसाईलां दागने आहली थाहरें गी नशाना बनाया।
5. पच्छमी एशिया च जारी तनोतनी दे चलदे- एअर इंडिया दा पैहला ज्हाज लोकें गी लेइयै दुबई थमां दिल्ली पुज्जा।
6. अफगानिस्तान ते पाकिस्तान दे बन्ने पर जबरदस्त झड़प्फां अज्ज उप्परोतली 5में रोज बी जारी।
7. ऑल इंग्लैंड बैडमिंटन चैम्पियनशिप अज्ज बर्मिंघम च शुरु- भारती दल दी अगुआई लक्षसेन करा करदे न।

<><><><><><>

### PM Strong Economy

प्रधानमंत्री नरेन्द्र मोदी होरें आखेआ जे भारत अपनी मजबूत अर्थबवस्था कन्नै विश्व लेई आशा दी किरण बने दा ऐ। प्रधानमंत्री होरें आखेआ जे एदे कन्नै गै तेज आर्थिक विकास विकसित भारत दे नजरिये गी साकार करने दा आधार बनी गेआ ऐ। बजट उपरांत आयोजित वेबिनार च आर्थिक विकास गी सतत ते सुदृढ बनाने गी वीडियो कांफ्रेंसिंग राएं सम्बोधित करदे होई श्री मोदी होरें आखेआ जे अज्ज विश्व विश्वास जोग ते लचीले विनिर्माण सांझेदारें दी तलाश च ऐ। उ'नें आखेआ जे भारत कोल इस दिशा च इक महत्वपूर्ण भूमिका निभाने दा मौका ऐ। प्रधानमंत्री मोदी होरें आखेआ जे सरकार दा इरादा ते संकल्प साफ ऐ- मता निर्माण करना- मता उत्पादन करना- मता सम्पर्क स्थापित करना ते मता निर्यात करना। प्रधानमंत्री होरें आखेया जे भारत नै केई देशें कन्नै मुक्त बपार समझोते किते न ते देश लेई अपार मौके दे पित खुली गे न। उ'नें आखेआ जे गुणवत्ता कन्नै कदे बी समझौता नेंई करना ते उत्पादें दा वैश्विक मानकें दे अनुरूप होना साढे सारें दी जिम्मेदारी ऐ। प्रधानमंत्री

होरें उद्योगें थमां अनुसंधान ते विकास च निवेश बदाने ते गुणवत्ता पर ध्यान केन्द्रित करने दी गुजारश कीती।

<><><><><><>

### Centre CAA Committes

केन्द्र सरकार नै पच्छम बंगाल च नागरिकता संशोधन बिल –CAA दे तैहत भारतीय नागरिकता दिवें दरखास्तें पर फैसला लैने लेई दंडु होर बाइख्तयार कमेटियें दा गठन कीता ऐ। केन्द्री गृह मंत्रालय नै इक गैज़टिड अधिसूचना च आखेया ऐ जे इनें बाइख्तयार कमेटियें दी अध्यक्षता भारत सरकार दे उपसचिव कोला उप्परले दर्जे दे अधिकारी आसेया कीती जाहग- जिनेंगी भारत दे रजिस्ट्रार जनरल ते मरदमशुमारी कमीशनर आसेया नामजद कीता जाहग। बड़ी मती गिनतरी च दाखल अर्जिएं दे नबेडे दे कम्मै च तेजी आहन्नने लेई दंडु बादू कमेटियां खडेरने दा फैसला लैता गया। पच्छम बंगाल च पैहले सवां ऐसियां दंडु कमेटियां मजूद ना। CAA पाकिस्तान- अफगानिस्तान ते बंगलादेश दे उ'नें प्रवासियें गी भारतीय नागरिकता देने दी बवस्था करदा ऐ जेहडे अपने मुल्बै च धार्मिक उत्पीडन दे डरै मारे 31 दिसम्बर 2014 कोला पैहले भारत आए हे ते इनें देशें दे 6 अल्पसंख्यक हिंदू- सिक्ख- ईसाई- बौद्ध- जैन ते पारसी धर्म कन्नै तालुक रखदे ना।

<><><><><><>

### Western Asia Conflict

ईरान पर इजरायल ते अमरीका दी सांझी फौजी कारवाई दे बाद पच्छम एशिया च संघर्ष होर खतरनाक शकल इख्तयार करदा जा करदा ऐ। ताज़ा रिपोर्टें मुजब इजरायल-तेहरान ते बैरुत च बी फौजी ठकाने पर हमले करा करदा ऐ। इजरायली फौज IDF नै आखेआ आ जे ओहदे सैनिक- दक्खनी लेबनान च मजूद न ते ओ हिजबुल्ला दे ठकाने पर हमले करा करदे ना। उन्नै आरोप लाया ऐ जे हिजबुल्ला नै ईरान दी तरफा हमले कीते ना। IDF नै इजरायली हमले च बैरुत च फिलिस्तीनी इस्लामिक जेहाद दे कमांडर अबू हमज़ा रामी दे मारे जाने दी तस्दीक कीती ऐ। इक होर हमले च इजरायल दी फौज नै बैरुत च हिजबुल्ला दे खूफिया मुख्यालय दे प्रमुख हुसैन मकलद गी बी मारी देने दा दावा कीता ऐ। एहदे इलावा अमरीका दी केन्द्री कमान नै आखेआ ऐ जे अमरीकी फौज नै इस्लामिक रिवोलेशनरी गार्ड कोर IRGC दे कमान ते नियंत्रण केन्द्रें- ईरानी ब्हाई रक्षा ढांचे- मिसाईलां ते ड्रोन दागने आहली थाहरें ते फौजी ब्हाई अडडे गी बी तबाह करी दिता ऐ। सोशल मीडिया पोस्ट च कमान नै आखेआ ऐ जे अमरीका- ईरान दे खलाफ कारवाई जारी रखोग। तोंआई दुई बक्खी ईरान दे सरकारी अमरीकी ब्हाई अडडें गी नुक्सान पुजाने दा दावा कीता ऐ। अमरीका च बहरीन दे राजदूत अब्दुल्ला बिन राशिद बिन अब्दुल्ला अल खलीफा नै आखेआ ऐ जे बहरीन दी ब्हाई फौज नै

ईरान दी 70 बैलिस्टिक मसाइलें ते 59 ड्रों गी रोकेया ऐ। ईरान नै सऊदी अरब दे रियाद च अमरीकी दूतावास पर ड्रों कन्नै हमले कीते ना। एहदे पर अमरीका दे राष्ट्रपति डोनाल्ड ट्रम्प होरें आखेआ ऐ जे अमरीका एहदा पूरा तगड़ेआई कन्नै बनकदा परता देग।

<><><><><><>

### Trump Merz Meet

अमरीका दे राष्ट्रपति डोनाल्ड ट्रम्प पच्छिम बंगाल च जारी संघर्ष दे चलदे अज्ज व्हाईट हाउस च जर्मनी दे प्रधानमंत्री फ्रेडरिक मर्ज हुंदे नै मलाटी करगंन। दौनें नेताएं दी इस मलाटी दे बाद इक दपक्खी बैठक बी बक्खरे तौरा पर आयोजित कीती जानी ऐ। अतरु ऐतवारें अपनी इक सोशल मीडिया पोस्ट च जर्मनी दे चांसलर होरें आखेआ हा कि ओ ट्रम्प हुंदे नै पच्छिम एशिया ते ताजा हालात बारे चर्चा करगंन। मर्ज होरें आखेआ कि ओ यूरोप ते इजरायल च अपने सहयोगियें कन्नै उप्परोतली सम्पर्क च ना। उनें आखेया कि एह टाइम अपने सहयोगियें गी उपदेश देने दा नैई सगुआ इकजुट होइयै कन्नै खड्गोने दा समा ऐ। एहदे शा पैहले उनें ईरान दे परमाणु कार्जक्रम दा बी विरोध किता हा ते ईरान थमां इजरायल ते क्षेत्र दे होरनें सहयोगियें खलाफ फौजी हमले बंद करने दा आहवान बी कीता।

<><><><><><>

### US-IRCG Comm

अमरीका दे फौजै उपरोतली जारी अभियानें दे दौरान इस्लामिक रेवोल्यूशनरी गार्ड कोर दे कमान ते नियंत्रण केन्द्रें- ईरान दी ब्हाई रक्षा छमताएं- मिसाइल ते ड्रोन प्रक्षेपण थाहरें ते फौजी ब्हाई अड्डें गी तबाह करी दिता ऐ। अमरीकी केन्द्री कमान नै सोशल मीडिया पोस्ट च आखेआ जे अमरीका- ईरानी शासन थमां पैदा होने आहले खतरें दे खलाफ फैसलाकून कारवाई जारी रखोग। इस्सै दौरान अजें धोड़ी 6 अमरीकी सैनिक कारवाई च मारे गेन। अमरीका दी केन्द्री कमान नै आखेआ जे सेना नै हाल च गै इलाके च ईरान दे शुरुआती हमलें दौरान नुक्सान पुज्जे दे ठकानें थमां दंऊ लापता फौजियें दियें लोथां बरामद कीतियां ना। फौजी कारवाई अजे जारी ऐ।

<><><><><><>

## AI Flights-Dubai

पच्छम बंगाल च जारी संकट दे चलदे एयर इंडिया दी पैहली डुआरी अज्ज दुबई थमां नमीं दिल्ली पुज्जी। Air India नै सोशल मीडिया पर इक पोस्ट च दस्सेया जे इस डुआरी च 149 यात्री ते 8 Crew सदस्य सवार हे। एयर इंडिया नै केन्द्र सरकार नागरिक उड्डयन महानिदेशालय ते दुबई दे स्थानीय अधिकारियें गी उन्दे सहयोग लेई धन्नवाद किता।



## IndiGo Spl. Flights

नागरिक उड्डयन मंत्रालय नै आखेआ जे इंडीगो अज्ज जेददाह थमां भारत लेई 10 विशेष राहत डोआरी संचालित करने दी योजना बनारदी ऐ- तांजे फसें दे यात्रुएं गी वापस आनने च सुविधा होई सकै। एह जरूरी स्वीकृतियें ते मौजूदा हवाई क्षेत्र दी स्थितियें दे अधीन होगा। मंत्रालय नै इक ब्यान च आखेआ जे इंडीगो यात्रियें दी सुविधा लेई जेददाह स्थित भारतीय वाणिज्य दूतावास कन्नै तालमेल बना रदी ऐ। केन्द्रीय नागरिक उड्डयन मंत्री राम मोहन नायडू होरें बी इक उच्च स्तरीय बैठक च स्थिति दी समीक्षा कीती।



## CBSE-10<sup>th</sup> /12<sup>th</sup> Exam

केन्द्रीय माध्यमिक शिक्षा बोर्ड नै पच्छम एशिया क्षेत्र च इस महीने दी 5 ते 6 तरीक गी होने आहली 10मीं ते 12मीं जमात दे मतेहानें गी स्थगित करी दिता ऐ। बोर्ड नै छात्रें ते विद्यालयें गी सूचित कीता जे बहरीन- ईरान- कुबैत- ओमान- कतर- सऊदी अरब ते संयुक्त अरब अमीरात च मजूदा स्थिति करी एह फैसला कीता। बोर्ड वीरवार गी स्थिति दी समीक्षा करोग ते सेही फैसला लैगा।



## DG Shipping

जहाजरानी महानिदेशालय नै आखेआ जे पच्छम एशिया क्षेत्र च बददे तनाव दे चलदे विदेशी झंडे आहले जहाजें पर कार्यरत त्रै-भारतीय नाविकें दी मौत होई गई ते इक जना जखमी होई गया ऐ। महानिदेशाल- IFC-IOR- MRCC ते होरनें प्राधिकरण सबे हितधारकें कन्नै तालमेल बना रदे न- तां जे उन्दी लगातार सुरक्षा ते समय पर मदद यकीनी कीती जाई सकै।

## Crude Oil Prices

पच्छिम एशिया च बधदी तनोतनी दे चलदे अज्ज कच्चे तेल दियां कीमता स्थित बनी दियां ना। मीडिया रिपोर्टें मुजब अमरीकी कच्चे तेल च 1 इशारिया 4 प्रतिशत दा बाद्दा दर्ज कीता गया ऐ जेहदे नै एह इक बैरल पिच्छे 72 इशारिया 2-3 डॉलर पर पुज्जी गया ऐ- जिसलै जे ब्रेंट क्रूड च लगभग इक इशारिया 9 प्रतिशत दा बाद्दा दर्ज कीता गया ऐ। दिनै दे शुरु च एह 79 इशारिया 2 डालर पर खुलेया हा। जारी तनोतनी च कुदरती गैस ते कच्चे तेल दी ढोआई लेई रणनीतिक लिहाज कन्नै महत्वपूर्ण होर्मुज जल उमरुमध्य च बवस्था च विघ्न दे बाद कच्चे तेल दियें कीमतें च उच्छाल जरुर आया ऐ। दुनिया च कोई 20 प्रतिशत कच्चा तेल इससै रस्तेया होइयै लंगदा ऐ। एहदे च भारत दे कच्चे तेल दे आपात दा 40 प्रतिशत हिस्सा शामिल ऐ। फिलहाल ते कच्चे तेल दियें कीमतें पर कोई मता असर नैई ऐ पेया पर प्रमुख अंतराष्ट्रीय माली संस्थान मॉर्गन स्टेनली नै चेतावनी दिती ऐ कि जेकर ऐसी स्थिति लम्मे चिरे धोड़ी बनी दी रौहन्दी ऐ तां ब्रेंट क्रूड दी कीमत 120 डॉलर फी बैरल पुज्जी सकदी ऐ।

<><><><><><>

## Melania Trump UNSC

अमरीका दी पैहली महिला मेलानिया ट्रम्प होरें 15 मिम्बरी संयुक्त राष्ट्र सुरक्षा परिषद दी इक महत्वपूर्ण बैठक दी अध्यक्षता कीती ऐ। बैठक दा विशे हा- “संघर्ष दे समें च बच्चें ते शिक्षा दी भूमिका”। अमरीका आसेया जारी इस बैठक दे ब्योरे च आखेआ गया ऐ जे मेलानिया होरें संयुक्त राष्ट्र सुरक्षा परिषद दे मिम्बरे गी एह संदेश दिता ऐ कि “शांति दा गडबडाना जरुरी नैई ऐ”। बैठक गी सम्बोधित करदे होई मेलानिया ट्रम्प होरें आखेया जे स्थाई रमानदारी तां गै हासल होई सकदी ऐ जिसलै समूलचे समाज च ज्ञान ते समझ गी पूरा-पूरा महत्व दिता जाहगा। उनें आखेआ जे कुसै बी राष्ट्र दे नेताएं आसेया शिक्षा गी दिते जाने आहला महत्व उस राष्ट्र दी विश्वास बवस्था दी बुनियाद बनदा ऐ।

<><><><><><>

## Pak-Afganistan

अफगानिस्तान ते पाकिस्तान दे बन्ने पर अज्ज उप्परोतली 5में ध्याड़े बी झडफ्फां जारी न जिसलै कि अफगानिस्तान दी सेना नै बन्ने आहले इलाकें च पाकिस्तान दियें केई प्रमुख चौकियें पर कब्जा करी लैते दा ऐ। अफगानिस्तान दे रक्षा मंत्रालय नै आखेआ ऐ जे पाकिस्तानी ब्हाई फौज दे हमले दे बाद अफगानी फौज नै पाकिस्तानी ठकाने पर जबरदस्त जवाबी हमले कीते ना। अफगानिस्तान नै दावा कीता ऐ जे उन्नै कंधार प्रांत दे स्पिन बोल्दक

जिले च 3 ते अली शेर जिले च 2 पाकिस्तानी चौकियें पर कब्जा करी लैता ऐ। दौनें मुल्खें बश्कार 21 ते 22 फरवरी गी पाकिस्तानी हमले दे बाद संघर्ष होर तेज होई गेदा ऐ। दवै धड़े इक-दुए पर फौजी ताकत दे इस्तेमाल दा दोष ला करदे न ते इस इलाके च शरेआम खुल्ली जंग आहला माहौल बने दा ऐ।



### PM World Wild Life Day

प्रधानमंत्री नरेन्द्र मोदी होरें अज्ज विश्व वन्य जीवन दिवस दे मौके पर जंगली जीएं जैतुएं दे संरक्षण लेई सरकार दी प्रतिबद्धता गी फही पक्का कीता ऐ। इक सोशल मीडिया पोस्ट च मोदी होरें आखेआ ऐ जे एह ध्याड़ा धरती पर कुदरत दे अनुकूल वातावरण गी संतुलित बनाई रखने आहली जीन्दी बन-सबन्नता दा उत्सव मनाने दा ध्याड़ा ऐ। मोदी होरें आखेया जे एह ध्याड़ा वन्य जीवन दे संरक्षण लेई कम्म करने आहले सबनें लोकें दे जतनें गी बी मानता दिंदा ऐ।



### PM You Tube

प्रधानमंत्री नरेन्द्र मोदी होरें अज्ज यू-ट्यूब पर त्रै करोड़ सब्सक्राइबर दा महत्वपूर्ण पड़ा पार करी लैता ऐ ते इस प्लेटफार्म पर सबनें शा मता फालो कीते जाने आहले दुनिया दे पैहले सियासी नेता बनी गेन। प्रधानमंत्री मोदी होर 2007 च यू-ट्यूब कन्नै जुड़े हे। रैकिंग दे मुजब ओ इस श्रेणी च होरनें केइयें लोकें शा अगगे ना। मोदी हुंदे फालोअरें दी गिनतरी अमरीकी राष्ट्रपति डोनाल्ड ट्रम्प हुंदे फालोअरें दी गिनतरी कोला 7 गुणा मती ऐ।



### Indonেশia Earth Quake

इंडोनेशिया दे सुमात्रा टापु पर अज्ज बड्डलै भूंचाल दे तेज झटके मसूस कीते गे। रिक्टर पैमाने पर इस भूंचाल दी तेजी 6 इशारिया 2 नापी गई ऐ। भारतीय समे मुजब एह भूंचाल बड्डलै 10 बज्जियै 26 मिन्टें पर आया। राष्ट्रीय भूकंप विज्ञान केन्द्र मुजब भूंचाल दा केन्द्र इंडोनेशिया च जिमी कोला 20 किलोमीटर हेठ दस्सेया गया ऐ। अजें तोड़ी कुसै दे मारे जाने दी कोई जानकारी नैई थ्होई ऐ ते नां गै सुनामी दी कोई चेतावनी जारी कीती गई ऐ।



## Iran Earth Quake

तोंआई ईरान च बी अज्ज 4 इशारिया 3 तेजी दा भूंचाल औने दी जानकारी हासल होई ऐ। अमरीकी भू-विज्ञान सर्वेक्षण मुजब भूंचाल दा केन्द्र दक्खनी ईरान च जिमी कोला 10 किलोमीटर हेठ हा।



## Badminton

ऑल इंडिया बैडमिंटन चैम्पियनशिप अज्जै थमां बरमिगम च शुरु होई गई ऐ। भारत चैम्पियनशिप दियें सबनें 5 स्पर्धाएं च अपने 12 मिम्बरी दल कन्नै शामिल होआ रदा ऐ जेहदी अगुआई करने दा जिम्मा लक्ष्यसेना गी दिता गेदा ऐ कीजे दंऊ बारी ओलम्पिक मैडल जिती चुकी दी पी.वी. सिंधु खाड़ी ब्हाई क्षेत्र बंद होने दे कारण दुबई च डकोई दियां ना। शुरुआती राउंड च भारत दा मुकाबला चीन कन्नै होग जेहदे च लक्ष्य सेन ते चीन दे मजूदा चैम्पियनशिप शि यू के आमने सामने होगं।

